

Wanneer ons iemand vir die eerste keer ontmoet, wil ons weet: Wie is hierdie persoon? Waar kom hy vandaan? Wat maak hom besonders? In Johannes 1 doen Johannes presies dit met Jesus. Maar anders as die ander evangelies, wat by Jesus se geboorte of stamboom begin, neem Johannes ons terug na vóór die skepping. Hy wys vir ons nie net wie Jesus was nie, maar wie Hy nog altyd is: die ewige Woord van God. Die woord het mens geword word. Hierdie waarheid is veral betekenisvol in Lydenstyd, wanneer ons doelbewus fokus op wie Jesus is en wat Hy vir ons kom doen het. Johannes nooi ons om Jesus met nuwe oë te sien, nie net as 'n groot leermeester of profeet nie, maar as God self wat mens geword het.

1. Jesus is die ewige Woord

Johannes begin met die woorde: “In die begin was die Woord.” Dit beteken Jesus het nie eers begin bestaan toe Hy gebore is nie. Hy was reeds daar vóór die skepping. Alles wat bestaan, het deur Hom tot stand gekom. Dit beteken Jesus is nie net deel van die skepping nie, Hy is die Skepper self. Vir ons beteken dit Jesus is groter as wat ons dikwels besef. Hy is nie net iemand wat ons help in moeilike tye nie; Hy is die bron van alle lewe.

2. Die Woord het mens geword

Johannes sê iets ongelooflik: die Woord het mens geword en onder ons kom woon. Die Griekse woord wat gebruik word, beteken letterlik “om in 'n tent te woon,” soos die tabernakel in die Ou Testament. Dit beteken God het nie ver en verwyderd gebly nie. Hy het naby gekom. Hy het deel geword van ons wêreld. Dit wys vir ons God is nie 'n veraf God nie. In Jesus kom Hy naby ons pyn, ons vreugdes en ons daaglikse lewe.

3. Jesus bring lewe en lig

Johannes sê in Jesus is lewe, nie net fisiese lewe nie, maar ewige lewe. Hierdie lewe bring lig in die duisternis. Dit beteken Jesus bring hoop, selfs in die donkerste tye. Wanneer ons Hom ken, het ons deel aan hierdie ewige lewe.

4. Ons word geroep om te getuig

Johannes die Doper wys vir ons hoe om te reageer. Hy het sy eie aansien prysgegee om na Jesus te wys. Sy lewe het een doel gehad: om mense te help om Jesus te sien. Ons word ook geroep om met ons woorde en lewens na Jesus te wys, sodat ander Sy lig kan sien.

Slot

Johannes nooi ons om self te ontdek wie Jesus is. Hy is die Woord, die Lig en die Lewe. Die vraag vir ons is: Wie is Jesus vir jou? En hoe verander hierdie waarheid jou lewe? Wanneer ons besef dat Jesus God is wat mens geword het, verander dit alles, dit gee ons hoop, betekenis en 'n nuwe identiteit.

Gespreksvrae

- Waarom dink julle begin Johannes sy evangelie deur te sê dat Jesus reeds vóór die skepping bestaan het? Wat beteken dit vir jou persoonlik?
- Wat beteken dit vir jou dat God in Jesus “onder ons kom woon het”? Hoe ervaar jy God se nabyheid in jou lewe?
- Johannes sê Jesus is die bron van lewe en lig. Waar het jy al hierdie lig in jou eie lewe ervaar, veral in moeilike tye?
- Johannes die Doper het sy lewe gegee om na Jesus te wys. Op watter praktiese maniere kan jy in jou daaglikse lewe na Christus wys?